

四庫全書

集部

欽定四庫全書

集部

瑤石山人稿卷十四至
十六

詳校官監察御史臣曹坦

中書臣劉源溥覆勘

總校官編修臣王燕緒

校對官中書臣陳木

謄錄監生臣恭安

欽定四庫全書

瑤石山人稿卷十四

明 黎民表 撰

七言律詩

請告後沈刑部顧中含張光祿秦參軍朱文學汪
茅二山人攜酒過訊

北闕停雲總繫情風期千里亦難并思鄉懷古不辭醉
擊劍高歌幾送行雪色漸催殘夜曙燈花偏傍麗人生

金定工尺八十一
卷十四
羅浮遠去丹霄隔，惟待春鴻一寄聲。

在告慧乾慧永二上人過訪歐博士范鴻臚同至
雪中扶策望層巒，九陌烟花半已闌。
儼雅方袍來入座，蕭條華髮不勝冠。
空齋作供羞梨栗，禪藻相看得蕙蘭。
欲說塵心應自笑，衰遲猶歎遇君難。

寄嘉齊宗侯

迴鴈新傳尺素多，登臨應為憶羊何。
琴尊長日閒朱邸，書殿春風滿綠蘿。
白水飛龍猶故士，楚人哀鳳自狂歌。

竹林聞有山公過憐爾才情滯玉河

時與方吏
部結社

寄子厚宗侯嘉齋之子

頗憶淮南招隱士曾題尺牘到滄州
西關明月幾回夜北關風沙千里秋
自信蛾眉能絕世誰吟白雪在高樓
上書一謝金門去青翰無因共傍舟

送司馬魯公總憲南粵

朱衣持節下長安奕奕威稜朔雪寒
官品最高三獨坐主恩新著九梁冠
定林香火他年事淮水功名異代看

賜履暫籌天塹險勿言江左有龍蟠

典午聲華際盛時雲霄玉立見竒姿平羌屢獻西川捷
降敵重看上谷碑劔鳥幾回依北闕簡書今日重南陞
六朝襟帶江山在莫忘登樓遠寄詩

答歐楨伯除夕立春朝回紀事用韻

新傳綵勝出彤闈步履蹒跚捧玉衣遼海捷書連日夜
漢廷歌頌有光輝身離天仗因多病夢繞家園欲奮飛
上國鶯花偏爛漫江南庾信幾時歸

人日督府參軍盧周王三子見過

買棹欲從滄海去因思聯句對參軍謝家池上憐芳草
漢時臺邊見白雲數為長齋開酒禁不緣狂墨換鵝羣
正逢人日晴難得三徑風流待使君

劉觀察李明府邀同余翰林過晉陽庵慈上人方

丈

多病已辭東閣履思歸猶阻玉河水偶尋香火過蕭寺
為證蓮花問竺僧燕雀晴依江閣暖烟霄春入漢宮層

雲房寂寞知生色曾向龍門御李膺

致政後吳鴻臚叔承自江都至過訪

未央朝謁罷晨雞揚柳春風戀解攜倡和正思臨海嶠
交遊多在竹枝西金門通籍沾新命皂帽逢人問舊溪
曾是白蓮琴酒客莫將榮賤比雲泥

焦山別陳玉叔犬參

疎梧院落值秋風惜別那禁酒盞空潮水欲生淮浦月
暮雲多在楚江楓平生癖統千金拙客路烟沙兩鬢蓬

縱是故人能引薦不令三詔到山中

同鄔汝翼黃清甫汪公幹李季常集姚伯子園亭
銅駝一別已參差邂逅名園倒接羅天外青山銜落日
尊前秋水浸平池閒無墊老來爭席坐有幽人對詠詩
招隱鶴林俱在眼幾時攜杖更相期

遊茅山

絳節雲中下列真山椒宮闕鬪嶙峋烟霞半雜龍池氣
芝朮深連柳谷春天上投壺多玉女殿前持蓋總才人

十年曾奉金門詔不種桃花學避秦

清磬疎鐘警夜遙夢迴偏憶紫宸朝雲移三島聯森駕
月冷千峰聞洞簫藥餌豈勞天府給弓旌誰待鶴書招
攬衣一宿空山裏萬壑烟花坐寂寥

高躡罡風上翠微鸞驂相遇待晨歸金環委地無人拾
毛節隨雲到處飛兄弟盡通仙籍少利名真覺畏途非
朱門九錫應無分塵海冥冥悟息機

玉晨宮觀起參差雲際三峰坐不移蕭帝恩深頌虎尾

秦庭高會閃龍旂
衣藏荒塚香鑪出
碑卧長廊薤葉披
浮世桑田共如此
仙人騎氣欲何之

送鍾潤州長卿入覲

中朝水部最名流
新領銅符握上游
詞客登臨同海嶠
仙人樓閣像瀛洲
城邊暫謝兒童竹
天上行參幕府籌
前席想應承召對
江南垂釣肯相求

金閭訪沈嘉則旅館

棠舟並艤越來干
廡下何人識伯鸞
買鶴俸錢誰為借

金史口月
卷十四
籠鷺經卷手曾刊功名荏苒看雙鬢歧路奔忙誤一官
紫氣東門長不斷羅浮梯閣幾回看

九日陳使君德基招同李季常飲呂氏園亭得華
字

秋風有路別京華猶滯吳江萬里搓刻燭共題三徑菊
解貂曾對五陵花烟生竹嶼深停翠霜淨楓林晚帶霞
賴有使君能載酒籃輿來過楚人家

同陳德基胡進士李季常同集呂心文園亭

黃塵車馬鬢成斑三月君能擲印還花下琴尊常遲客
望中雲氣尚臨關休論藜杖攜青瑣好去丹砂鍊玉顏
萬里鷗波元浩蕩可無招隱五湖間

同卓誠甫李季常黃公紹謁林和靖墓

封禪無書上漢庭生平不負北山靈七言麗句傳書史
千古清風賸草亭湖上秋風維客棹山前落日下南屏
梅花白鶴無消息水自潺湲草自青

寄潘司空

行水司空舊擅名紫宸飛疏報功成揚旌五嶺烽初熄
轉粟重溟浪不驚卧治未須論汲黯傳經終是待匡衡
掃門無復窺東閣高倚羅浮夢月御

同李季常泛吳江

才名吾敢羨同舟五岳真成結伴遊笠澤菰蒲連楚望
蕪城烟月夢揚州江邊霞氣多成雨驛路黃花併作秋
名姓幸無津吏識爵羅高鳥至今愁

奉答李蟠峰司寇

玄冕朱衣玉雪顏黃麻將下已還山千年合應龍沙識
八座頻虛鳳闕班談笑已收黃石畧烽塵不動玉門關
江湖猶自干星象身在蕪城紫氣間

送喻邦相之任蘭谿

絕足當時見過都酒杯相聚復江湖浮生一笑莊周馬
光寵仍飛葉縣鳧城外春流遙似澱望中仙嶠盡如壺
功名更奮青霄翼不負凌烟閣上圖

揚懋功同朱巍甫佳甫攜酒過覽勝樓

南浦從來傷別地高樓吟望更霑襟千門月色漁榔靜
午夜風江酒盞深明燭却添遊女恨絕纓誰識楚臣心
蕭條孺子湖邊路此去朱絃絕賞心

用晦宗侯偕趙脩甫刺史過訪

病後何人思越吟江樓尊酒愜追尋王孫麗句能千首
豪客華筵直一金隔岸烽烟邀舉扇西山涼月照披襟
文章千古應同調誰道交情異淺深

爽臺為朱子深宗侯賦

梅尉丹崖對面開更憐花竹夾池栽秋衣夜染星河燦
曙色初浮沆瀣杯黃鵠醉來招不下紫芝歌罷首重回
是非已付浮雲外難忘梁園詠雪才

唐別駕惟良招同康山人蔣進士集郡齋

一下青雲路萬重夢回偏憶五陵鐘西曹起草名猶在
北闕封書手自慵遠道欲歸逢暮雨客愁相對點干峰
丹砂此去尋勾漏江海瑤華不易逢

送康裕卿還東甌時赴唐別駕之招

客心殘歲兩相催故國東看斗柄迴一榻每依僧舍下
五言多向郡齋栽灘聲隱坐常驚夢愁色連天獨上臺
縱有梅花千萬樹豈能長缺不歸來

豫章逢王敬美入賀

龍沙鼓吹引行驕不作平原十日遊下士敢因縣榻重
故人寧為解衣留江霞欲變千峰雪籬菊初殘九月秋
不是王程虛物色卿雲遙待郢歌酬

寄曾以三大司馬

郢中高步有陽春
納履頻年侍紫宸
蓮座昔為同社客
夷門今愧報恩人
中朝禮數優專席
四海昇平寄一身
莫道雲泥今絕隔
夢中猶得拜車塵

經曲江寄懷黃清江

芙蓉秋色雨中微
幾欲尋君始願違
青史待書高士傳
滄波終避弋人機
心如越鳥還爭翥
山是梅花本解飛
為報曹溪禪宿在
香林燈火定相依

寄張肖甫中丞

金定世居全言
卷十四
回首風塵洛水杯感時思舊不堪裁山川險阨曾持節
帷幄疇咨實藉才白首餘生甘伏櫪黃金無夢更登臺
功名竹帛千年事惟願翹賢閣再開

寄許石城太常

芸閣休論青史在竹林應未覺途窮中朝月旦誰知已
海內靈光獨數公著述尚聞傳頌酒衣冠何地復趣風
揮金自是昇平樂却訝新亭事不同

留餘堂為潘司馬賦

華堂飛敞自留餘
昭代爭誇奕葉舒
共指王槐呈綠蔭
偏令謝樹照清居
窻開翡翠迎春靄
簾卷烟雲灑碧虛
自是承家名不忝
韋玄勲譽可誰如

青山曾擬卧龍居
草閣仍留滿架書
萬石家風元獨擅
關西經學定誰如
鸞書每拜君王賜
錦里重迎使者車
豐草崇蘭皆雨露
莫言三徑不留餘

讀書堂

昔賢曾選幽棲地
小築還依此洞天
二水遠從雲外落

千山半向檻中懸
流霞似護青編古
綵筆猶傳白雪鮮
未許閒居耽作賦
鳳綸先下五雲邊

芝林

雪水昆山恰耐看
春風僂麓五芝盤
瑤光乍散藂氛紫
玉暈初圍萬疊寒
秀纈齊房誇盛美
瑞含商嶺協扳歡
知君惟有探竒興
一曲應傳和者難

昆山草堂

湖上晴開萬卷樓
清時誰解卜菟裘
龍溪雙練雲邊合

震澤千帆雨外收，抗疏幾辭金馬詔。
題詩多在白蘋洲，滄浪縱有乘槎興，無奈中原正借籌。

逢姚山人

結客長安興已孤，寸心元自向吾徒。
誰從世外傳鴻寶，惟羨僊家隱玉壺。
短褐尚能頻說劍，明燈猶憶醉呼盧。
因君更問華陽事，昔日金籠尚在無。

發樟亭寄卓澄甫

不為除書始問津，天涯消息斷行塵。
家家爆竹新迎歲，

金史八十八卷十四
處處郵籤轉泥人桑苧已收三徑紀綠花虛度五陵春
來鴻往燕應相笑何事狂歌越水濱

唐觀察招飲天書道院

一出關門馬首東豈知交在片言中浮沈莫問青藜杖
身世行依紫極宮鳴玉昔聯南省步和歌真有郢人風
青林鏡吹沈沈夜阮籍何須嘆路窮

西莊耕雲堂新成陳太守同諸子過訪用韻

三徑頻來藉碧苔一區吾豈草玄才旋呼白鶴為童子

笑指春江是綠醅，隔岸黃塵休舉扇。
西山晴色好登臺，金門錯憶浮生事。
何似林中酒一杯。

謝家池館半蒿萊，話舊重斟竹下杯。
漁艇夜隨雙磧入，華門晴向五峰開。
求田計總輸秦客，張樂人猶指漢臺。
不是北山迷出處，煩君騎馬到蒼苔。

谷隱亭為鄭明府作

三徑初開倚少城，萬花中帶一池清。
傳家本擅司農學，避世誰沽谷口名。
壁上苔生閒釣具，竹間星亂有棋枰。

莫言神武抽簪早自是蓬蒿少送迎

送梁孔適詣闕

津亭過雨散炎埃畫舫青簾薄暮開太史定占鳧舄至
清時爭待鶴書來螭坳對奏遲高步龍井經遊想駿才
魯是竹林琴酒客能無垂白望燕臺

趙太史招遊浮丘山

委佩朝來出漢宮暫將蹤跡托冥鴻掃門曾識登龍客
採藥今為負局翁嶺外素琴隨一鶴斗間文劍化雙虹

周南不用嗟留滯
矯首燕臺氣鬱葱

解印南歸問五湖
昔遊風月未曾孤
閒攜天祿青藜杖
來坐僊人白玉壺
碧海蓬萊今又淺
丹砂勾漏豈全無
前身恐是浮丘伯
勝事重逢蔣大夫

遊浮丘移酌心遠亭次陳公載韻

郭外名山下築新草堂
花徑亦相鄰
三休竟老王官谷
四皓虛稱漢室臣
金液方中迷日月
桔槔機上偃絲綸
五龍莫更誇高卧
恐有徵書到隱淪

少參漆公太史趙公過浮丘

負郭初開一徑荒
丹丘雲氣尚微茫
松間更有潮通井
壇畔誰知石化羊
太史探書經禹穴
羣公持斧靖炎方
疎才幸際昇平日
不逐青螺去故鄉

閣道丹梯駕汶寥
青松飛蓋影相交
尊前共攬蒼精佩
花下同趨絳節朝
紫氣闕門仍不散
赤松天路肯相邀
樓船已息重溟浪
策杖何時過野橋

鄧君肅陳亮夫任夫林開先諸子招飲水竹居

夜來新水到柴扉
鳴雨空階滴漸微
詞客清尊開別墅
佳人紈扇畫雙飛
沙邊宿鳥聞歌起
江上征帆入暮歸
車馬長安塵似海
不如乘醉卧漁磯

寄余德甫觀察

不向清時滯一官
青山繞屋薜蘿寒
蔬盤菜婦能供給
玄草諸生許借看
交態人今多側目
賦才君莫羨登壇
長途灑淚非兒女
祇恐梅花驛路難

寄貞湖瀑泉蕪簡少玄默菴

片帆南去過輕鴻
百里龍沙一瞬中
別後有心如白水
尊前無樹不丹楓
浪遊豈為營金橐
罷秩何人丐玉龍
一夜西堂應有賦
扁舟明月賞心同

秋日趙太史招集浮丘聽笙亭同祁羨仲鄧德咸
林開先三孝廉賦得山字

持節初營海上山
金銀樓閣出人間
僊衣七日乘風下
玉管雙飛載月還
濁酒休論身外事
丹砂能駐鏡中顏
采真恰遇瑤臺客
後夜雲車未可扳

壽黃明府六十一

三徑歸來際盛時，長生僊籙此初披。
尊前起舞多瓊樹，林下徵歌半紫芝。
蕉鹿休論循吏傳，柴桑常赴野人期。
五羊城下春如海，遙指蓬萊問楫師。

東莞楊明府義叔誕日

星軺計日赴燕臺，青鳥銜書海上來。
三禮才名高鼎甲，專城風采映中台。
璇房花發鳴琴處，瑤水春深獻壽杯。
白首文園深屬望，殿東持橐待雄裁。

送少參漆公還朝

霜清木葉下庾闕却指金莖杳靄間官列瑣闈知地重
功收溟海見時艱僊山多暇方聯步宣室無端又召還
北闕恩深猶未報因君長夢紫宸班

送梁貢元北上

青袍何事滯蒿萊兩世談經有俊才手托驪珠堪自惜
篋攜龍劍待誰開遊蹤暫瑣崧臺月客路先探庾嶺梅
東閣至今猶薦士明堂三禮待新裁

送趙太史還蘭谿

朱衣銜命下金鑾到處人傾執法冠
瘴海烽烟臣節苦文園休沐主恩難
歸裝應折梅花去關吏頻將紫氣看
一榻羲皇清夢醒依依紅日近長安

寄唐惟良

莫道分符不暫間五更無吏喚追班
尊前嶺樹連官閣門外春濤噴雪山
萬里身為遠播客幾人名在是非間
長楊羽獵還今日應遣詞臣入漢關

十六夜同黃幼章鄧德咸林開先飲梁少嘉鏡林
何事良宵與願違林塘春色瑣柴扉烟花金谷成寥落
車馬長安有是非明月避人深隱霧緒風無賴更吹衣
此身已在雲羅外猶羨冥鴻縱意飛

雨中過浮丘懷太史

蒼茫佳氣望中收想像仙人駕彩虬獨鶴不知春事晚
清溪長共白雲流塵途已息莊周馬物外誰追葛令遊
惆悵王孫歸去後鷓鴣鴻滿汀州

壽何明府母八十一

海上誰開獻壽卮，北堂高宴起參差。
飛鸞每逐雲耕下，舞鶴還同彩袖垂。
舉案豈能忘舊節，彈琴今更有佳兒。
春風正是芳菲日，開遍桃花第一枝。

送王用吾觀察之貴竹

伏波銅柱早登壇，新命仍加執法冠。
千里風聲傳木夾，三年冰雪寄珠官。
人從益部占星入，雨過碣房倚馬看。
莫道殊方頻歷試，循良先著御屏端。

寄陸六亭憲使

京洛蒼茫攬客裘，風前長嘯拂吳鉤。
馬卿車騎辭梁苑，杜甫詩情在閬州。
暮雨幾經沽酒肆，江花猶滿著書樓。
杖藜便擬從君去，不恨相逢是故侯。

故人李季常汪公幹自維揚來訪，志喜用季常韻。
中原迢遞阻山河，蓬徑誰知二仲過。
江路正憐新漲滿，風期遙指白雲多。
塵中舊恨千杯失，篋底新詩幾字謾。
何事冥鴻招不下，肯來千里問烟蘿。

竹下翻然念友生，炎方應不憚征行。
帆前韻石盤千磴，海上金銀望五城。
蒼苔鍊來堪却老，鷓鴣啼處若為情。
知君汗漫心無已，肯以羊裘容帝京。

送郭郡牧還閩中

江干經歲罷垂綸，應為羅浮入夢頻。
烽火故園雙別淚，鶯花千里獨吟身。
長途健步猶存馬，末路卑飛總畏人。
九曲風烟青雀舫，不知何處有迷津。

送李比部伯任使閩中

桂樹叢中共酒杯又逢持節故鄉來金閨通籍三株秀
白社題詩八斗才離席暫因歌舞緩王程爭待簡書催
漢廷不為淮南事願播薰絃向九垓

中秋傅遜之見過小樓

短榻疎燈對濁醪朱絃切切為君操銅龍細咽孤城思
銀漢晴翻萬里濤鴻雁將歸書懶寄芙蓉銷落興無聊
佳人白苧休相怨共倚南樓看月高

送汪公幹還新安

天涯雙壁喜相投不為金裝萬里遊
丹荔夢回千嶂雨
白魚歸及五湖秋明珠滿載鮫人淚
虹月偏隨估客舟
玉鳥未留滄海上能無懸榻待南州

答李季常新秋寓海西社寄懷

策杖初從石室迴暮雲相望海西臺
穿針樓上新停燭
避暑林中共舉杯風土橘州差可隱
山川炎嶠幾能來
雞壇近日無爭長盡道青蓮有俊才

七星巖

白玉樓中貯列僊，浮來滄海是何年。
風雲半出窓前地，日月雙懸袖裏天。
苔雜雨花侵坐榻，澗含春溜入平田。
輕舟欲采芙蓉去，觸散芳湖九點烟。

玉虛宮

蓬萊千仞削孤根，玉座遙瞻黑帝尊。
細草繁花秋滴露，彤雲紫霧畫當門。
天河近向懷中瀉，鰲極遙從掌上翻。
知駕麟車何處去，滿山涼月嘯清猿。

流霞島

一徑纔通鳥道微，千峰元氣北中歸。
天傾西北誰曾補，山近蓬萊亦解飛。
石鏡看為陰洞月，紫蘿化作白雲衣。
卧龍不省人間事，風雨時來濯釣磯。

端州

桂嶺西來是上游，堅城笳鼓鎮雄州。
將軍舊擁樓船下，使者曾乘錦石遊。
短筏半多輸竹戶，長裾亦有采蓮舟。
風流江漢何如此，不為無魚嘆蒯緄。

即事

時有墨陽異記

姑射仙人玉雪肌
九華天上遇靈妃
鍊成金骨能輕舉
飛去瑤臺竟不歸
一代詞臣爭點筆
千年華表定沾衣
人間轉覺滄桑異
不信乘鸞有是非

石室山寄沈純甫

石室經竒久未迴
因思許靖向南來
刺桐花擁蠻姬醉
白芷歌傳逐客哀
灘水半黃遙入海
楚山將暮一登臺
羊何舊好雖能賦
不共流霞竹下杯

遊石室山歸區用孺過訪

區端州人

玉洞金壺氣象分歸來真詫遇僊羣誰能開徑遲羊仲
便欲移家似少文丹檢旋開添石乳山圖初展折青雲
蒼龍知待新宮賦寂寞金牀不共君

樓居新成

江上黃塵不可遊中林小築勝丹丘北城隱地聞鐘鼓
西塔橫空掛斗牛萬里已歸餘皂帽一枝差足憫菟裘

春鴻知爾深延佇王氣常依翡翠樓

時琰兒
在銓部

嶺嶠冰霜歲少逢北窓猶自敞深冬烟花迤邐開千井

鐘梵蕭寥落半峰
紺石東行秦尉築
金沙西注葛侯封
多慙長者回車轍
累月扳雲少定蹤

雲氣朝來海上青
緒風吹夢酒初醒
臨池小奏雕蟲技
探筭惟留相鶴經
星象天邊低析木
江湖歲晚散浮萍
梅花最起高樓思
不是關山笛裏聽

十載追趨捧禁闈
翻然歸興落漁磯
詩餘對御初栽草
篋有薰香舊賜衣
綠酒易狂猶強制
金丹雖老不言非
海門東去扶桑近
黃鵠冥冥何處飛

送陸參藩

白簡當年侍帝除，英英冰玉更誰如。
乘槎遠問珠官俗，望闕仍驅節使車。
翠幄懽承瑤水宴，皂囊人識上林書。
長安貴客如相問，滄海依然舊釣魚。

送舍甥林開先會試

長楊羽獵賦初成，又奉籃輿入漢京。
身似麒麟行萬里，心同藜藿仰重明。
征帆細雨遲遲去，離思春雲冉冉生。
到日天門占氣色，泥金先慰竹林情。

送關婿北上

翩翩旅雁下江沱
矯首黃金氣色多
操筆豈慚鸚鵡賦
出門休論庾亮歌
長途芳草依單騎
南國春風滿綠蘿
花底鳴珂須記憶
故園吾已卧魚蓑

送致兒北上并示琰兒

朝來東海氣成霞
想見千官候物華
綵筆欲成三殿賦
青袍貪看五陵花
中朝諫獵傳司馬
別墅圍棋憶謝家
雲路奮飛堪自惜
勿論吾種邵平瓜

白石清泉未盡貧蓬蒿今喜卜居新不求緝統千金枝
又見騰驤八尺身桑柘暫違南國暖鶯花深駐帝城春
衰遲未有酬恩處跂爾追班入

闕

荅張王屋

平子歸田賦已成尚栽花木寄閒情授經門下侯芭在
采藥林間許掾清祇有烟霞供枕藉尚思塵土笑逢迎
槎頭縮項應須釣共泛滄溟看日生

黃公紹城西草堂同袁文學鄧山人賦

紅槿編籬竹作橋堤邊應可繫蘭橈已無絲竹相縈聒
惟有琴書伴寂寥沙鳥下窺花散陣遊魚出泳水生潮
路人知是濠梁客不用雄文為解嘲

秋夜過陳伯求同鄧君肅張儀仲鍾會貞小飲

磯邊泛艷水平池百堞涼雲靜不移白練醉書逢大令
朱絃新調有鍾期風淪魚藻千重錦月寫菱花一曲眉
自是仙源難得到阮郎歸去莫相思

答張儀仲陳伯求過北園草亭

野客歸來問舊谿
遙林應與北山齊
滄溟雨氣垂天際
越井風光在竹西
過客長留門外履
新詩多滿壁間題
辟疆自有田園興
花下壺觴屢為攜

秋夜與張儀仲陳伯求黃仲孝攜張合卿過小樓
千里相期興不虛
林塘猶是落花餘
雲間明月頻更燭
雨後新荷急濺珠
玉樹風流吾獨倚
碧雲襟韻更誰如
蓬蒿寂寞青谿裏
賴爾能來問隱居

偶述

少不如人豈獨今偶因雲雨遂飛沈三朝異典曾沾命
一世爰書不在心筆札幾承天表側履聲初下玉墀陰
閒來檢點人間事五岳名山未盡尋

十六夜對月

蟋蟀梧桐秋滿庭浮雲散盡自疎星仙人修月渾無跡
使客乘槎自有靈一道銀河通碧落三更白露下青冥
西風忽起吹黃鶴夢斷瑤池酒未醒

寄題匡山讀書處為胡孟弢賦

抱犢無心管送迎
含毫初賦子虛成
雲山指點知名姓
澗水沿迴識淺清
白鹿解銜階下草
丹砂能斷世間情
梅花遠道傳消息
一嘯蓬萊海日生

七言排律

和李季常同汪公幹過予新居錫爾樓用季常韻
首夏清和叶舜薰
梯樓還得共論文
沈珠浦上鵬風起
越井岡前鴈翅分
三徑逢迎多散客
一時交誼總憐君
籠鶯舊帖傳青李
辟蠹殘編拂綠芸
白社比來增氣色

潢池今喜息妖氛賓筵倒屣迎王粲海嶠題書似陸雲
蒲俎自應殊臭味茶槍還欲鬪竒芬巡簷浙瀝詩初就
下筋稀疎酒半醺行旅莫深流落感竹西詞客本同羣

浮丘用前韻

葛僊壇上轉南薰日莫登樓見霽文錦繡山河形四塞
金銀宮闕氣平分藝蘭舊事聊隨俗刻竹高談屢對君
魯酒半傾花上露楚香頻擷澗邊芸聽笙稍見來天仗
舉扇誰能障海氛丹鉛棄來猶偃月紫荷飛後尚蒸雲

鳥窺歌席成清韻
草藉行衣帶異芬
但可淹流延夕景
不妨嘲笑倚微醺
欲從溟海看朝日
須向浮丘借鶴羣

浮丘用公幹韻

清池泛艷雨中開
涌出蓮花似五臺
倚檻影如窺獨鶴
過橋聲半隱輕雷
花殘恨不邀春住
客好何妨結伴來
不信化羗原是幻
從知鳴雁亦非才
風前屢挹浮丘袂
水上初投越井杯
勾漏移家還此地
天涯雙鳥未須回

郭東臯郡牧至自閩中招季常公幹同集

生平懷抱為誰開
失喜相逢趙尉臺
人訝仙舟同李郭
坐稱禪客是宗雷
江濤忽湧雙龍至
風馭重驅九鯉來
百歲光陰成過客
一時廊廟幾憐才
寒暄欲敘頻更燭
鷄黍淹留未盡杯
千里山川徒極目
暮潮猶得送君回

瑤石山人稿卷十四

欽定四庫全書

瑤石山人稿卷十五

明 黎民表 撰

五言絕句

別吳而待

相逢各已壯，努力愛前期。
不用投孤劍，銜恩自有時。
戀闕心仍在，還家路不迷。
淒涼弔古意，疲馬入青齊。

江行

風隱正揚舲帆流帶夜星殷勤不肯別似惜蔣山青
袁郎清詠處月夜遇征西寂寞憐才意空江鳥自啼
楚人菰米飯越女芰荷衣風土將相近家園猶未歸

樵溪雜詠為黃廷賓

衡門絕塵鞅隱几面青山兀坐非南郭冥心萬象間
玉笈朝朝啟琅函夜夜開甘泉多侍從應薦子雲才
為愛花時好遙林載酒過曉鶯啼不徹芳緒坐來多
銀浦流雲淨清輝獨映君夜來風露冷仙樂下方聞

雲生青几上泉落素屏間若個堪招隱何須更買山

秋雨集清泉精舍以唐人雨中山果落燈下草蟲

鳴為韻

明月隱青厓高樓曠延佇黃葉忽翻飛前山夜來雨
松下坐來久起行山月中涼風吹衣帶挂罨青桂叢
老去耽冥寂秋來常閉關還因送客遠夜出虎溪山
石田已收秣野蘿垂結果盤餐雖無魚留客中夜坐
芳樹日凋零為怨秋風薄唯有山中人無心任開落

結曲花源路柴門復幾層酒醒遊客散松杪出殘燈
載酒涉花林周遊古城下暫爾惜塵勞明朝復驅馬
樓北控青山是昔呼鸞道金輿終不來羅衣散秋草
絕塞聞征鴈疎籬隱候蟲故園添白髮今夕又秋風
舉火照山影山禽不住鳴幽人思千里茲夕夢難成

送子與同次甫作

落日登古臺垂楊拂闌干不見路傍草烟沙浩漫漫
手摘卷菘草願傳雙飛翼車輪千里遙中心自不隔

采桑南陌頭羅綺嬌青春使君停五馬不是冶遊人
愁心貯折麻佳期怨采綠思君腸九迴何似黃河曲

隱園雜詠

玉林

一雙餘隙地種此青琅玕夜靜疑風雨蕭森萬籟寒

茶泉

鑿井得海眼清冷味如雪青絲轉轆轤下汲秦淮月

中林堂

夾林開綺構前對雨華臺
倏忽烟嵐起庭中萬象來
思玄室

玄珠本難求得之在罔象
回照一室間萬形自霄壤

春雨畦

夜聽蕭疎響春畦長漸高
丈人方兀坐抱甕亦徒勞

觀生處

世故多歧路功名一聚塵
觀生何處是半榻隱吾身

容與臺

六朝迹蒼莽長江流古今高臺自風月不廢我登臨

海月樓

明月出海底倒影池上樓清輝不可攬白露濕衣裘

鷺羣閣

清池浴皓羽亂此晝畫影蘋末來清風葛巾自慵整

鷗波

白鷗日飛來止我茄下食不但無機心回旋似相識

柳浪堤

金塘澹淡浮垂柳參差碧千里江南春移來君几席

飛影亭

太虛本無色止水亦長瑩如何桂輪中忽有山河影

浮玉橋

短橋流不去迴波相激鳴度我幽尋屐千花隔岸明

芙蓉館

何年移玉井開作滿池花白鳥凌波去青天裂片霞

鶴徑

曲徑不用車通行止孤鶴畏有紅塵蹤驚我巖花落
萃止居

睠然京華遊歲暮心無已寄謝陶柴桑今朝真已矣
借眠軒

曾作秦淮夢篝燈對風雨客散春山空獨鶴向人語
別次甫因憶子與

疎雨過高城流雲止雙闕陰晴千里外何處看明月
風雨入夏涼林花開復謝深杯不共持奈此消閒夜

鹵莽風塵者相逢總問津如何臨別酒重憶遠遊人

賞菊

不用嗟搖落春風在習家天山三丈雪猶作滿籬花
疾風吹勁枝寒月照冷艷獨抱歲寒心林深人不見
列岫亭以窓中列遠岫為韻

月與青山對開門玉作雙有時乘倒景簸弄石罅窓
端居不出戶吟嘯此亭中石床留夜月桂樹搏秋風
藥畦將菊徑整整方成列帶經日徘徊芳蕤露中折

會心不在多一丘堪偃蹇始笑武陵人移住花源遠
我本青山雲無心還出岫雖走塵埃中時時夢三秀

種桃為汝和作

誰種瑤池樹粧成漢苑春金門雖避世猶是武陵人

題汝和石鼎寮

思苦詩難就松窓月過餘可憐方外客不解俗人書

過雪舫試龍井茶同張玄超郭次甫作

試將龍井茗瀹以玉河水齋中幽賞客容易辨淄澠

流塵息戶屨桂影上團圞一軟清源味能令齒頰寒
送署正請告還宜興

雉意感尼父鴻冥說商山風塵誰不厭君早去人間
暫解金門紱來窺玉女潭故人京路外瓊樹憶江南
曾繕部省中夜再賦一絕

竹下少行塵詩篇入夜新黃花雖滿徑不是倦遊人
同鄒方伯繼甫遊羅浮

架壑鐵橋跡飛空不著人煩君驅石去千古導迷津

丹竈

偃月秘真詮
寒溫無火候
白鶴屢回旋
知為仙掌守

水簾洞

瀑布望如何
上與銀潢接
噴薄雙飛龍
褰裳不可涉

石樓

壯士圖麟閣
仙人惜蕙樓
洞門常反鎖
惟待采真遊

自贛石舟行數百里
山水多可遊
涉未能申獨往

之興記以八絕

玄潭漱孤石青谿下雙練歲月屢經遊功名慚擬峴
曹溪傳去後白足老空山若論心是佛誰此置禪關
棟宇非長物弦歌有妙思畸人雖委蛻幼婦獨留碑
瓣香丞相祠行舟時一駐陰風起松籟還作青螺雨
時來據鼎足身後餘篇翰不見隴岡碑文章薄秦漢
羊裘無客星桐江尚名里下有清淺流亦似新安水
心事俱已休名山尚留蹤芳湖清且淺曾照漢時容
感激龍門誼淒涼下士風鴻冥不可企江水自流東

竹在亭四絕為貞吉賦

高節凌霜雪孤根有歲年
若論梁苑賦三徑是青氈
深心探豪素蕭條無所欲
臨池愛清風坐蔭數徑竹
人間不出戶落葉任紛紛
借與青鸞尾牕前掃白雲
齋閣夜蕭寥風林散清影
天籟忽刁騷幽人夢初醒
園居雜詠二十首為顧玄言作

嶢峩閣

小樓無結構勢與嶽崙敵
雨電縱橫下恐有飛來石

盧仙井

碧甃草蒙茸
仙人手自封
莫教沉斷綆
留得照清容

古梅岡

為愛凌霜幹
開花千萬樹
待我羅浮人
同君會心處

影澗磯

有月色還空
無風浪常靜
如何假合中
忽有山河影

茶峽

玉露溥清夜
芳藜發舊谿
無人知采摘
山鳥為先啼

清音亭

汨汨寒流細烹茶取漫流有時來枕畔添作一絲愁

顧令公祠

桐鄉有遺愛瓣香日來往奕世揚清芬何慚太岳長

龍谷關

抱石日沉吟都無寓世心不知猶出谷雲氣夜來深

迴賞寮

遙林山暝色返照入疎樹一與幽人期徘徊不能去

蒼松障

蚪枝亂如織崇朝羃烟霧何人畫匡廬請君添瀑布

沃亭

紅蕖冒綠水秀色相凌亂漁人刺艇來恐斲荷根斷

慧臺

躑步凌高臺景氣非一狀明月本團圓不為山河障

曲引

林下翳猶在清溪澹不流江山閱人世惆悵昔賢遊

脩竹圃

蕭瑟萬琅玕清陰五月寒
閒門原不鎖僞客任來看

嘯齋

蜩螿假翅鳴真人息以踵
劃然空山裡萬壑泉俱涌

石雪賴

水石霜縈薄波濤日激撞
平生多履險莫誤呂梁淙

懷陸館

著述傳畸士風流與後人
一杯溪澗水猶想酌茶神

丈室

青山無隙地會景方卜築那知藩籬外隱予誠亦足

圓照亭

瀟水斷來人圓泓媚幽寂應知澹泊心不受蓮花色

石經幢

一資龍象力孤標尚撐拄金薤無人識千年漬花雨

雜畫為劉仲脩題

古木帶迴溪來尋逕路迷莫驚春事盡花在野橋西

溪上風欲來扁舟歸漸緊不暇問桃源
賴是柴門近
清溪漫飛絮策蹇疑無路不為探梅花
誰肯衝寒去
一片空濛色前山雨乍來荒村應可泊
且棹酒船迴
長風送棹歌得魚滿笊箸若逢朝市人
道是江南景

呂氏心文友園亭雜詠十二首

玄覽樓

井幹何郭落高出萬象表縱目無涯觀
冥心破昏曉

素心居

中歲耽禪寂勤心禮世尊
天花羅萬夾圓悟本無言

寒芳亭

雜花滿芳樹四時不改色
有酒須盡懽春風應可惜

松月臺

娟娟雲間月濯濯松上露
杖策時一來神姿翼飛步

石丈

嶽碕帶古髯瑰磊離俗態
更無兒女腸須合整衣拜

陽和洞

窗外留書帶階前卧綠槍倦來拋素卷狼藉滿金床
總芳徑

人閒無俗累日與花為友惡客應不來琴尊落吾手
石几

昔人留曲几何似石貞堅鳥跡縱橫遍安知後世傳
長生池

遊魚樂深池豈知肉登俎吾自貴吾生浮沉亦從汝
友芳橋

隔浦風煙暗桃花自不迷壺觴憐小阮時向竹林携

溜石

流泉自清泚片石激成瀧午憩留孤枕塵心此處降

山礬障

芳心自凌亂翠帶常綰結日暮望佳人瑠蕤不堪折

題芙蓉畫

玉路試新粧盈盈照秋水不是芙蓉花顏色應相似

六言絕句

旅感

塞北江南迢遞春花夜月闌珊送客無情芳草催人有意青山

楊柳閨中寄恨梅花嶺下相思試問紅顏幾度春風頻自傷離

瑤石山人稿卷十五

欽定四庫全書

瑤石山人稿卷十六

明 黎民表 撰

七言絕句

楊溪洞四時歌

十年蹤迹愧名山一入松扉竟未還
偶記桃華歸去後遂傳春色到人間

長松落落蔭丹霄策杖看花過野橋
更有薰風生澗底

入雲清切間蕭韶

我夢霓衣歷紫宮
瑤華如雨散西風
偶逢子晉曾相約
後夜乘鸞向月中

四序迴環驗落花
巖扉苔徑足煙霞
青山不用頻招隱
自有寒松共歲華

和子乾舟行

溪流東去水雲深
十載青山負夙心
今日停舟聊一望
幾時携鶴住楓林

兩岸清沙映落紅
溪頭知有夜來風
扁舟却恨尋春晚
不見桃花二月中

姑蘇曲

寶帶橋西柳作花
吳王宮殿冷棲鴉
蛾眉邀得旁人顧
日暮江邊自浣紗

橫塘清淺映紅妝
摘葉攀花持贈郎
浮萍飄泊無根蒂
不似芙蓉到死香

卧芝山房為傅木虛弟木剡作

茆盈兄弟昔餐霞回首松門幾度花
留得玉芝逾橘井
煉成金骨勝丹砂

新種龍仙葉葉長春風吹作辟邪香
那能白日驟鸞去
手把璫枝獻紫皇

高卧深山抱玉書商歌一曲意何如
只愁四海雲羅密
又出人間護漢儲

閉門日日草玄文階下熏成五色雲
靈藥不將雞犬試
仙壇今已候王君

元夜曲

束素施玄紺髮光暗塵偏逐越羅香內庭不放金蓮炬
只恐蛾眉妬艷妝

蕭史乘鸞下帝臺參差仙蓋拂雲來分明禁苑春先到
萬朵芙蓉月下開

宮詞

漢主離宮太液傍舞臺妝榭映垂楊林穿翡翠渾無色
花拂瓊蕤併是香

寶月團圓開素波宮娥前隊引笙歌白雲鄉遠應難到
爭似琳池樂更多

金屋無人奉屬車君王初誦上青書日長不用教歌舞
自繞琪壇學步虛

未央樓殿敞秋風芝火煌煌徹夜紅知是驂鸞朝太乙
旌幢斜出五雲中

祥鴉飛散曙光微魚鱗沉沉晝漏稀唯見玉關馳露布
不聞金殿坐霄衣

曾屬良家在禁城卷衣新得侍雲屏
同來女伴無消息
唯記宮監舊姓名

立殘銀漏未更衣聞道龍池駐翠駢
衛士夜深傳畫燭
御街塵起侍臣歸

聞捷報

鏡歌橫吹過彤雲天子明堂議戰勲
金帛未應酬死士
麒麟先畫霍將軍

翩翩朔氣引戎旌回望陰山斥堠平
用盡黃金餉邊塞

幾人曾為取龍城

聞杜鵑

咽月聲寒露氣微
三聲濕盡楚人衣
從來北土殊棲息
何事南中久未歸

午日同諸親友泛越江作

水滿金塘鳧鴈飛
吳姬雙漿逆潮歸
只愁楊柳絲難繫
不畏芙蓉露濕衣

越瑟當壚發浩倡
門前初繫紫遊韉
銀槽酒潑流霞色

不羨宜城九醞香

魚龍曼衍戲江波
天吳起舞翻蛟鼉
連天白浪愁無那
誰勸公歸莫渡河

珠海東連黃木灣
化成樓閣水雲間
秋花錦石行疎日
五月潮生噴雪山

題畫美人

花落苔青永巷幽
羅衣一侍幾經秋
長門縱有歲粧鎖
爭奈閒情逐水流

曲江絲柳漾春風
侍女開元結束同
妝罷臨池人似鳳
紫駟飛入玉宸宮

夜聽洞簫同子乾作

天外飛聲逐紫凰
響隨寒葉繞空廊
曲終盡作行雲去
月落關城幾樹霜

沛上

手提三尺定咸京
黃屋東歸父老迎
今日豐碑荒草沒
行人猶記沛鄉名

豫章江行

赤岸斜臨溪水陰
亂峰高下寄禪林
新流到海三千里
不似歸舟一夜心

山磴崎嶇猿夜號
溪流如沸石如刀
刺桐花下思歸客
待得天明有二毛

聞馬市講和諸邊晏然識喜

隴北遼陽摠乞和
盡驅龍種度黃河
一時內殿三千隊
應費東吳萬匹羅

長堤一望盡如雲
沙苑秋開牧馬羣
黃竹漫勞行萬里
柳營從此息三軍

敵騎翩翩起朔風
朶顏三衛亦梟雄
藁街不是稽傳首
應念當年靖難功

幾年宵旰在關門
今日垂衣拱至尊
檢玉不須升岱岳
泥金應合會玄元

荅徐汀洲

君向淮陽承主恩
予亦扁舟歸故園
金陵花月何曾

見殺氣西街白下門

胡床坐嘯海風秋
明月關山滿戍樓
麟閣何人誇彩筆
功名應合佩吳鉤

青山霜落九溪瀆
齋閣風流有使君
褰帷欲指金臺路
玉女先開五色雲

燕京飛雪正漫漫
十二樓空鐵鳳寒
白首書生隨計吏
共邀明月醉長安

寄題潘少承西樵山房

新營丹室鐵泉山千樹梅花不共攀
夜夜京華成短夢
白雲紅葉屋三間

送吳而待守歸州

洞庭西上蜀江深兩岸青楓映竹林
楚舞已歌隨使節
猿聲何處更霑襟

衰草寒煙過楚宮荒臺猶起大王風
風流宋玉應同調
白雪高吟郢國中

十月江清露冕遊鷓鴣啼處楚雲流
如花笑倚黃陵廟

日逐長安客自愁

斑竹岡前烟霧開
京臺高築望蓬萊
論才却是馮唐老
使酒誰招季布來

苦熱行

火雲高擁太行間
飛雪峩峩不可攀
翠栢蒼松枯欲死
清涼空說五臺山

雲裡樓臺白玉京
龍綃飄動引飛瓊
涼風更奏哀蟬曲
十里荷花碧浪生

月殿星宮望拜勞
緼蘭麝涌金鼇
仙人自有玄霜散
任爾陽烏十丈高

索米長安少俸錢
無何安得醉花前
渴羌自有封侯相
拜舞君王賜酒泉

擬古溪堂半畝陰
瓦甌磁缶足怡心
如何病渴朱門客
欲吸鯨波萬丈深

送吳明卿再謫睢陽司理

逐客新從澤畔來
悲歌還上孝王臺
掉頭不顧千金價

東閣雲霄祇自開

濟中還復枉帆過
急景停觴柰爾何
陌上春花逢李白
故人西指薊門多

睢水無聲下急湍
古園修竹半摧殘
問君領郡因何事
此地曾飛白雪寒

笙鶴常過嵩少山
知君蹤迹在其間
科頭醉卧三花月
不與長安貴客攀

出關曾賦五噫歌
鳴鳥相求意氣多
携手燕京明月色

隨君千里渡黃河

送徐中丞巡撫畿內

繡斧朱旗出未央
北門開府鎮漁陽
雪山萬里無烽火
析木高垂鳳闕光

海內衣冠望不孤
笑談樽俎解兵符
將軍肯羨祈連冢
壯士休乘大宛駒

古北黃花勢接連
墩臺何日息狼烟
留屯計策應先定
上苑曾傳諫獵篇

伐鼓撞鐘樹羽旗六羸沙漠遁歸時已磨上谷山頭石
刻作中興破陣碑

題顧汝和所作寒影圖

澗底青枝接鳳鸞梅花相並重琅玕虎頭畫手風流在
能向西窓寫歲寒

汝甫過宿軒中同玄超子野賦

黃金臺下日西飛野客相逢又解衣半醉不知塵世事
白雲和夢到山扉

燕臺駿骨圖為陳侍御道襄賦

千金增價在燕都
電目蘭筋骨法殊
細柳營中方按轡
大宛何用獻龍駒

寒鴉圖

寒山寂歷野蒼蒼
繞樹驚飛不斷行
畫角一聲天欲曙
金河翻落滿城霜

過沈山人懋學旅舍

烟花聯騎走燕都
十載相逢又酒壚
金谷園中非舊主

長安明月可曾孤

送王儀甫之蓬萊縣

紫馬東溟路轉賒
杖藜予亦苦思家
後期記取青門酒
滿地垂楊罨落花

蓬萊高閣坐朝暉
宮錦猶披舊賜衣
招手列仙朝絳闕
六鼇搖動海濤飛

雨後經天壇沙河口占

平沙雨濕草茸茸
白玉高壇紫翠重
馬上行人看不厭

石廊流水繞疎松

玉河堤畔聞歌

一曲新聲起鳳樓他鄉明月易生愁涼風嫋嫋吹難去
併作寒波出御溝

月夜過楨伯旅館

破鏡雲間照寂寥愁將寒影對良宵關山一一征鴻去
似逐梅花出麗譙

雨後錢姚元白還金陵召歌者篩成侑酌醉後賦

此為別

楓江涼雨夢歸吳回首長安紫氣孤君見金陵舊花月
清歌能似此間無

鼓柁瀟湘未有期尊前同醉把花枝豪遊縱有青雲客
子夜吳歌我獨知

北闕秋深雨不開翠眉紅燭夜相催浮雲世事應難料
明月看山誰共來

送王宅松補邵武府太守

虎竹初分出鳳樓
嶺雲關月莫生愁
幔亭舊接烟霄路
不是仙人不浪遊

詠懷濠上古跡寄李伯承

西過流沙道逾尊
空餘紫氣在關門
金函玉檢無人識
留與龍孫細討論

泉咽風鳴釣籟閒
千年秋水秘玄關
君家濮上相隣近
不厭婆婆一樹閒

雲臺峰上五龍仙
吏部才人亦好玄
雙劍精靈成寂寞

解頤還有李青蓮

送陳金吾祭王屋山

飛轡千峰躡紫霞
沐蘭還宿太清家
金芝歸獻長生節
笙鶴難淹二室花

露氣初高曙色寒
蓬萊宮闕正東看
金泥奏罷神君答
松柏蕭森白石壇

同梁鍾二曹長過劉山人旅館看菊花作

下馬銅街日已斜
北風衣袂滿塵沙
秋光却在聞門巷

深鎖忘憂一樹花

却立西風舞翠茵一枝枝似拂梁塵漢宮最妬塗黃額
莫遣霜娥見麗人

重九花開已自遲雪中猶裹最繁枝金門白首悲詞客
似爾飄零過歲時

雨中撥悶

愁見飛花委綠蘿習家池上急經過明妝艷粉相携奪
看到開殘較幾多

日日傷春到水頭
推頹還擁黑貂裘
夢回不識邯鄲路
老去真思廣武遊

風雨秦淮花事稀
春光強半在薔薇
蛾眉已自愁金屋
更遣臨春舞畫衣

栢子潭

瑯琊山雜詠

玉輦當時擁萬靈
手扶千栢尚青青
石廊紅葉圍山寺
一曲寒波倒日星

庶子泉

李公妙迹已千年零落荒山何處邊世人祇重鷲羣字
過落空迷鳥篆篇

歐陽公二亭

林壑山公去後寒鶯花又過幾春殘風流自合傳千古
試覓徐陵片石看

瑯琊寺

山木千重嵐霧低紗燈猶照晉招提楞伽不益身前事
聽盡泉聲日又西

龍泉寺

落葉連山寺不開
夜深騎馬踏荒苔
殘僧對客吹蘆管
風雨龍池颯沓來

題畫為李宮詹子蕃

玉露漙漙綠葉披
花開金粟影離離
仙禽欲下棲難定
誰為華林借一枝

武龍清齋太乙宮
上林舞處不春風
遙知絳節隨王母
青鳥飛來御苑中

雲中曲

小袖紅粧學內家
檀槽高撥走龍沙
將軍只道邊城樂
不見燕桃二月花

莫嘆明妃墮塞塵
臙支亦是可憐人
蔥河迷却關山路
玉帳前頭立繡裯

題廬山瀑布圖送黃觀察之鄱陽

香爐千嶂霽生雲
遙接天門紫氣分
湖海烽烟今汛掃
不妨停蓋謁匡君

濛濛雨氣濕丹臺萬壑濤聲送薄雷一片瓊花吹不散
仙人長駕白龍來

五日同盛仲交屠田叔小飲各以事散去明日復

會於雙塔寺

已過端陽一日來亟思塵夢理殘杯庭前幾樹葵榴在
有酒愁花不再開

傭書五載老燕關君亦陳情解印還時田叔告終養留取風沙

雙病眼鄮州明日共看山

題畫馬贈黃幼章南歸

沙塞風高萬馬馳
五花雲錦散瑤池
九真亦有麒麟種
不是長安果下騎

躡電追風不受韁
千金有意待孫陽
君王駕馭多奇駿
肯使天閑老乘黃

伏暑經桐廬道中

清淺無如七里灣
層崖飛瀑下潺潺
子陵不為南陽起
賴是清源有此山

丹霄回首夢魂驚
避暑還催奏賦成
滄池何處堪停蹕
笑指荷花放舸行

草爛松枯太劇晴
轉多煩熱是舟行
驚湍夜入還家夢
疑是青林風雨生

玉盤盛水貯甘瓜
蟬鬢迎風翠袖斜
冰水如山供坐客
驕陽不入五侯家

張元易飲紫菊二首

誰倚名園鬪麗華
霜風披拂似晴霞
不如開落空山裡

淺白輕黃靖節家

叢桂秋風若有期
一生鉛粉不曾施
如何偃蹇東籬下
猶學長安半額眉

送李春卿文學之博羅

鼓篋諸生待絳紗
不同勾漏遠移家
天雞喚醒遊仙夢
倒覽扶桑五色霞

送傅成之文學之閩中

日射蓬萊氣色高
無諸城下海生濤
賦成應有凌雲氣

臺倚仙人舊釣鼇

命家僮於庭前雜蒔花木戲為九絕

南陌東城無限花
竹籬藤架任欹斜
柴門亦有閒風景
不道歸期已過瓜

金谷園中墮繡裯
一枝憔悴可憐春
但將醕酤酬高格
不與鉛華作後塵

騎馬長安日幾回
梅黃已過麥秋來
蒿紅縱好非春色
憑仗東風幾日開

遊蜂舞蝶太匆匆爭較繁華一瞬中縱使花開能爛漫
不知榮落總成空

微雨初晴蓓蕾開更教長袖夜深回開時正好留連看
待到飄零幾客來

古木長藤半斧痕霜藜猶自宿離根煩君著意防風雨
待到深秋發滿園

挿槿編籬費討量此生窮達任蒼蒼若教小草看成徑
綠竹抽梢已過牆

強半光陰在直廬
鶯花笑我太相疎
故園亦詫忘歸去
不寄長安五月書

小隊紅妝結束新
妖嬈偏泥遠遊人
縱饒頓遜杯中物
不似銅駝陌上春

送張光祿元易使邊兼還河東展省

翠釜黃封勞外臣
關門乘傳遣詞人
燕支拜舞君王賜
一曲琵琶絕塞春

三休亭上狎樵漁
愛子持觴問起居
不似東山輸別墅

願從黃石授兵書

單于內屬已銷兵瀚海天山夜不驚玉節盡驅龍種至
大宛何必墮重城

馬上微吟更擊鮮齊州回望入青烟綵毫奏技明光日
不羨封侯到酒泉

貂裘日貫酒壚家夜半籠燈上日華馬湏金杯休醉客
春風思對五陵花

送陳汝信

揚帆萬里楚江行
君是無機亦有情
千樹梅花如問訊
羅浮同看日初生

題天長館壁

日色曉殘野草花
行人觸熱轉堪嗟
仙餅自汲清冷水
誰解鸛裘付酒家

尊酒文園會不稀
五陵豪客自輕肥
荒雞喚醒山郵夢
猶憶更衣入瑣闥

鄧君肅以菊花見貽
口占五絕奉荅

燕臺幾見此花開
急管繁絃處處催
籬下白衣雖寂寞
儘教明月照深杯

重溟天氣煖如春
霜後繁花作意新
桃李園中相映發
却將穠艷趁芳塵

山人老作灌園翁
手插疎籬玉滿叢
莫道看花容易得
長年多雨更兼風

篁竹烽烟起戰旗
西風迸淚對花枝
柴桑便合抽簪去
難得閒田種紫芝

零落西園萬片霞
顛狂呼酒醉隣家
鷄鶻冠上雖簪却
絕世元稱隱士花

隔牆桃花戲作

十日春光偏泥酒
雨中猶見隔牆花
丈人已自無機事
莫道東隣是宋家

同君肅少仲公紹開先諸子飲舍弟惟仁宅贈歌
者

故園杯酒肯辭頻
今夜雲間月色新
不信清歌能醉客

鶯花曾見五陵春

和端州太守王君宗魯七星巖二十景詩

石室龍床

紫氣冥冥護白龍
玉鱗千載尚留蹤
天門一去成霖雨
閒却金梯十二重

瀝湖漁棹

欸乃漁歌遠
近聞青油晴
卷瀝湖雲蓮
舟蕩漾歸來晚
籠燭城邊候使君

虹橋雪浪

牛女相望一水中
神人驅石便成虹
奔雲噴雪三千丈
不是靈槎豈易通

天閣晴嵐

赤闌曲曲繞層臺
風蕩嵐光水倒迴
一片青天涵石鏡
菱歌原未有人來

金闕朝陽

珠旗掣曳七星文
萬壑朝暎射紫雲
清漏一聲猶未歇

星妃如雨導神君

寶陀夜月

西方初月吐嬋娟湖上輕風罷釣船
遙想水晶宮殿裡
蓮花燈下一僧禪

星亭擁翠

隨波上下似蓬壺白玉樓臺天下無
惟見七星浮水面

不聞詞客賦仙都

岩即古
仙都山

霞島飛璫

丹霞為闕石為扉
玉溜淙淙欲濕衣
湖上只開雙玉鏡
飛璫乘月幾時歸

樹德松濤

幽人伏枕興無聊
何處翻江作怒潮
夜半天雞驚夢醒
萬川明月照空寥

栖雲榕陰

栽花種柳滿溪潯
太守風流苦費心
後人指點甘棠樹
密葉曾遮十畝陰

紫洞禪房

一半禪栖出翠微
蒼苔石滑到天稀
西天絃管休回首
只合山門老衲衣

蓬壺仙徑

白石參差徑路斜
玉壺終日秘青霞
紫芝滿地無人采
十里風吹古桂花

臨壑荷香

桂棹沿廻一水香
秋風吹冷芰荷裳
洛神邀得陳王賦

故向瑤池試曉粧

方塘魚躍

千頃澄波溢作池為君添作鯢魚陂江湖老去應忘我
只是臨流少惠施

杯峰浮玉

菱葉荷花素錦鋪中流一點落星孤扁舟曾逐玄真子

呼酒狂歌碧浪湖

吳興碧浪湖有浮玉山

天柱浮虹

玉筆高替黛色濃
海門長日駐高春
世情盡逐頽波去
誰住羅浮四百峰

仙掌春風

五夜吹班鳳沼東
亭亭仙掌立春風
蓬蒿寂寞文園裡
錯憶金盤出漢宮

閩巖夕照

秋作千峰翠作陵
松間織鳥挂寒藤
道人半醉斜陽酒
指點金銀最上層

河波泉湧

翠壁千重玉斧開中間一道出風雷若逢李白香爐上
定取銀河入酒杯

石洞雲封

人間日月易飛奔浪水桃花自一村怕有漁樵來往路
白雲長積掩柴門

送梁少嘉內姪北上

鵠沼麟園望不迷丈夫何事戀卑栖豪遊曾結長安客

千里人知碧玉蹄

海子荷花十丈開
龍舟避暑未應迴
無媒亦有江南樹
扶荔宮中著意栽

一葦所如為何太僕作


肘後黃金亦可憐
身閒羸卧五湖烟
人間縱有瞿塘險
不到蘆花釣渚邊

三徑誰尋仲蔚家
秋風幾度桂松花
卧遊想到蓬萊闕
一片山窻落海霞

送歐公孫遊南雍兼寄其祖虞部公

金陵花月不曾空
粽汁曾經飲楮公
伏暑夢迴茅屋底
何人酤酒話江東

江夏童年已拜郎
殿前扶侍有輝光
冶城高會羣公在
白首山林引目長



瑤石山人稿卷十六